

Ո Ր Ո Շ ՈՒ Մ

Վարչական իրավախախտման գործով գանգատն առանց բավարարման, իսկ որոշումն անփոփոխ թողնելու մասին

03.04.2019թ. 17-2-1419
03.04.2019թ

ք.Երևան

Ճանապարհային ոստիկանության պետ, ոստիկանության գնդապետ Ե.Կարապետյանս, վերանայելով Կարապետ Սողոմոնյանի դիմումի շուրջ ստեղծված նյութերը,

Պ Ա Ր Զ Ե Ց Ի

2019թ. մարտի 6-ին Կոտայքի մարզ ք.Չարենցավան 3-րդ թղմ. 262. 11քն. բնակիչ Կարապետ Սողոմոնյանը դիմումով հայտնել է, որ ստացել է վարչական տույժ նշանակելու մասին ԱԴ թիվ 792863 որոշումը, որի հետ համաձայն չէ, քանի որ վարելիս եղել է անվտանգության գոտով ամրակապված: Քաղ.Կարապետ Սողոմոնյանը հայտնել է նաև, որ ոստիկանը բացահայտ խաբեության կերպով կազմել է արձանագրություն: Դիմումատուն խնդրել է հետևողական լինել նման աշխատակիցների նկատմամբ:

Դիմումի ուսումնասիրությամբ պարզվել է, որ 05.03.2019թ. ժամը 12:50-ի սահմաններում Երևան քաղաքի Զաքյան փողոցում քաղ.Կարապետ Սողոմոնյանի կողմից վարած «VAZ-21099» մակնիշի 35 QU 181 հաշվառման համարանիշի ավտոմոբիլը կանգնեցվել է Ճանապարհային ոստիկանության ուղեկցող սպայական վաշտի 3-րդ սպայական դասակի ավագ տեսուչ, ոստիկանության կապիտան Գ.Գալստյանի և նույն դասակի տեսուչ, ոստիկանության կապիտան Ա.Հարությունյանի կողմից՝ ՃԵԱԱՄՕ-ի խախտման համար, այն է՝ վարորդն ավտոմոբիլը վարել է անվտանգության գոտին չամրակապած վիճակում: Վարորդի նկատմամբ կազմվել է վարչական իրավախախտման վերաբերյալ արձանագրություն և, համաձայն ՀՀ ՎԻՎ օրենսգրքի 123.3 հոդվածի, կայացվել է ԱԴ թիվ 792863 որոշումը՝ վերջինիս 5000 դրամ տուգանելու մասին:

Դիմումում նշված հանգամանքների շուրջ պարզաբանումներ տալու նպատակով՝ քաղ.Կարապետ Սողոմոնյանը ծանուցագրի միջոցով հրավիրվել է Ճանապարհային ոստիկանության ՃՊԾ բաժին, որտեղ գրավոր բացատրությամբ հայտնել է, որ դիմումին ավելացնելու ոչինչ չունի, խնդրել է հիմք ընդունել դրանում ներկայացվածը և քննարկման արդյունքների մասին իրեն տալ գրավոր պատասխան:

Ըստ ծառայողների գրավոր բացատրությունների՝ Երևան քաղաքի Զաքյան փողոցում նկատել են, որ իրենց առջևից երթևեկող «VAZ-21099» մակնիշի 35 QU 181 հաշվառման համարանիշի ավտոմոբիլի վարորդն երթևեկում է անվտանգության գոտին չամրակապած վիճակում: Սահմանված կարգով կանգնեցնելուց հետո ավագ տեսուչ Գ.Գալստյանը մոտեցել է վարորդին, ներկայացել, հայտնել է կանգնեցման պատճառը և պահանջել պատասխանատվություն:

վարորդը չի ընդունել իր կողմից իրավախախտում թույլ տալու փաստը և պնդել է, որ ավտոմոբիլը վարելիս եղել է անվտանգության գոտով ամրակապված, ինչպես նաև պահանջել է ներկայացնել իրավախախտման փաստը հավաստող տեսագրություն: Վերջինիս պարզաբանվել է, որ իրավախախտումն եղել է ակնհայտ, պարզ տեսանելի և այն չի տեսագրվել, սակայն արձանագրելու համար բավարար հիմք է հանդիսանում դրա ակնհայտ լինելը: Ավագ տեսուչ Գ.Գալստյանը վարորդի փաստաթղթերը ստուգելուց հետո կազմել է վարչական իրավախախտման վերաբերյալ արձանագրություն, որից հետո քաղ. Կարապետ Սողոմոնյանը ծանոթացել է կազմված արձանագրության բովանդակությանը, արձանագրության մեջ նշել է իր անհամաձայնությունը, այնուհետև որոշում կայացնելուց հետո ստորագրել և ստացել է որոշման իր օրինակը: Ծառայողները հայտնել են նաև, որ իրավախախտումն եղել է ակնհայտ, պարզ տեսանելի, անմիջապես իրենց տեսադաշտում, որն էլ սահմանված կարգով արձանագրվել է:

Համաձայն «Ճանապարհային երթևեկության անվտանգության ապահովման մասին» ՀՀ օրենքի 17-րդ հոդվածի՝ Ճանապարհային ոստիկանության ծառայողը պարտավոր է տրանսպորտային միջոցը կանգնեցնել, եթե ակնհայտ կամ տեխնիկական միջոցների օգտագործմամբ երևում է, որ վարորդը խախտել է ճանապարհային երթևեկության կանոնների պահանջները: Նույն հոդվածի 8-րդ մասի համաձայն՝ երթևեկության սահմանված արագության գերազանցման և տրանսպորտային միջոցների ապակիների լուսաթափանցելիության սահմանված չափի խախտումների համար պատասխանատվություն է առաջացնում, երբ տվյալ խախտումը փաստարկված է համապատասխան տեխնիկական միջոցների կիրառմամբ:

Այսպիսով, քաղ. Կարապետ Սողոմոնյանի արարքում առկա է վարչական իրավախախտումների վերաբերյալ ՀՀ օրենսգրքի 123.3-րդ հոդվածով նախատեսված իրավախախտման զանցակազմը, ուստի, ելնելով վերոգրյալից և ղեկավարվելով վարչական իրավախախտումների վերաբերյալ ՀՀ օրենսգրքի 293-րդ հոդվածի 1-ին մասի 1-ին կետով,

Ո Ր Ո Շ Ե Ց Ի՝

1. Կարապետ Սողոմոնյանի դիմումը թողնել առանց բավարարման, իսկ Ճանապարհային ոստիկանության ուղեկցող սպայական վաշտի 3-րդ սպայական դասակի ավագ տեսուչ, ոստիկանության կապիտան Գ.Գալստյանի կազմած վարչական իրավախախտման արձանագրության հիման վրա 05.03.2019թ. կայացված ԱԴ թիվ 792863 որոշումը՝ Կարապետ Սողոմոնյանին հինգ հազար դրամ տուգանելու մասին՝ անփոփոխ:
2. Սույն որոշման օրինակներն ուղարկել Ճանապարհային ոստիկանության վարչական գործունեության բաժանմունք և դիմումատուին:
3. Սույն որոշումը կարող է բողոքարկվել ՀՀ վարչական դատարան՝ օրենքով սահմանված կարգով և ժամկետներում:

Ե. Կարապետյան

